

南潯志卷二

里人周慶雲纂

公署 會館公所附

監鎮衙 宋於諸鎮設監官其衙各設本鎮今無攷

鹽漕水利湖捕通判署 在東柵大街懼字一圩舊管糧通判

署在府治西乾隆八年移駐南潯以便控制巡哨十一年卽

潘尙智没入官房改建衙署正堂燕堂內宅計三進又東廂

耳房三進宅門大門照牆披柵一切如制咸豐庚申六月十

二日粵匪至鎮燬去頭門八月十六匪復至衙署全燬光緒

二年通判劉克成請撥善後公款四千餘金重建三十一年

通判孫錢募資重修署設書識一名門子二名快手六名巡

南潯志

卷二 公署

一

緝民壯十名鹽捕五名阜隸八名軍健八名轎傘扇夫七名

巡船二隻水手十五名

汪志按金友理太湖備攷云太湖同知初制兼轄浙省太湖乾隆八年湖

州府通判移駐南潯太湖水面按照兩省地方分界管轄

巡撫常安請通判移駐南潯疏太湖瀦水汪洋支港紛雜

實爲盜賊淵藪臣查湖州府所屬南潯鎮與江省接壤地

處湖濱烟火萬家商賈雲集易藏奸匪向設巡檢不足以

資彈壓請將湖州府城駐劄之通判移駐書役人等俱照

本官原設除通判衙門事務循舊管理外其太湖水面按

照兩省地方與江南太湖同知分界管轄各縣編烙船隻

姓名造冊申送通判以憑查對并令每歲督催清釐倘失

事疏防應將通判與專汛官一體叅處每月駕船遊巡并

將會哨緣由分報道府查考以杜規避所需衙署現有潘
尚智入官房屋應撥出正房三進東側房三進改爲通判
衙署添建牆垣披柵木橋至入湖巡緝應添造唬快船二
隻駕船水手十五名巡湖民壯十名查通判衙門向有鹽
快十五名快手八名阜隸十二名今各州縣緝私有府縣
鹽捕哨兵足敷差遣請於通判鹽快內撥出十名充巡湖
民壯又於快手內抽撥二名阜隸內抽撥四名充補水手
尙少九名有烏程長興二縣從前撥協江省之民壯四名
應行掣回留充又從前烏青鎮同知衙門原設巡鹽哨兵
二十八名因缺奉裁分派安吉等七州縣今應抽撥五名
以足水手之數所有工食按季解給毋庸添設至通判關

防請鑄給以昭信守庶平行分任呼應較靈用以弭盜安
民大有裨益乾隆九年三月三日奉旨依議

桂榮重建南潯通判署記

文見
碑刻

巡檢司署 在南柵箋字一圩舊制後潘司巡檢署在縣東五
十里後潘村元置吏一員弓兵十八名明洪武十四年復置
後圯移居南潯稅課局又圯僦居庵觀民舍視事無常處至
乾隆四年奉文改爲南潯司部頒印信巡檢曹進創建衙署
三進儀門一間大門三間照牆一座嘉慶二十三年巡檢張
鳳來重修道光十三年巡檢胡次耕復修咸豐庚申六月十
二日粵匪至鎮被燬後任賃居民房視事管轄南潯鎮及十
七區至二十三區地方東接江震西通郡城南達含山烏鎮

北近太湖漚港水陸叢雜彈壓巡緝設書識一名阜隸二名
弓兵十五名

胡次耕重修南潯巡政廳記

文見碑刻

分防南潯汛千把總署 在西柵嘗字四圩久圯歷任賃居民
房舊制湖協右營千把一員輪防外委千把一員馬步戰守
兵丁五十八名船六隻舊在嘉應廟側故當時有嘉應汛之
稱後改本汛千總或把總一員戰兵六名守兵十三名兼轄
東遷汛守兵五名三際橋汛守兵五名舊館汛守兵五名晟
舍汛外委一員守兵七名昇山汛守兵五名粵匪後又改南
潯汛兼顧晟舍把總一員 按汛地縮小 步戰兵五名守兵十
九名晟舍汛外委一員 即馬兵一名 守兵四名此缺宣統二年裁

南潯志

卷二 公署

三

水師統帶辦公所 粵匪初平伏莽堪虞大吏以潯鎮爲水陸
要衝調水師統帶一員勇百餘名砲艇十餘艘分泊各水柵
口並離鎮略遠之水道扼要處同治五年唐都司秋元到防
七年租絲行埭張姓基地籌資建屋爲辦公之所歷任統帶
因之

湖屬鹽捕水師營辦公所 承緝湖州全屬私鹽設舳板十餘
艘搶划數十艘以管帶領之分駐城鄉各區其管帶賃西柵
民房爲辦公所時出巡哨

巡警局 自省城設巡警道後城鎮巡警剋期成立潯鎮於宣
統二年正月賃民房設局就團防水陸勇八十人中裁去半
數改募巡勇二十名由通判督帶省局派警官一員訓練之

團防局 光緒二十一年募勇四十名謂之長防至二十七年里人劉錦藻等籌捐募設飛划八艘管帶一員水勇四十名局設廣惠宮右鳳梧堂後增募二十名并長防爲百名宣統三年九月停辦

設立團防公呈劉錦藻龐元濟張寶善邱炳垣邢傳經梅鴻金燾閔次顏錢汝雯周慶雲陸熊祥邱炳珍李惟奎沈克剛等爲籌備飛划公舉管帶謹將所擬章程並請領軍火呈請察核事竊北方拳匪交鬪已肇禍端近來謠言迭興隣近蘇省村莊劫案層出南潯人煙稠密宵小潛踪而地當要衝尤爲若輩往來出沒之所若非嚴密巡緝難免無意外之虞潯鎮駐防營勇惟楚軍新左營分泊柵內外

舳板八號湖協右營汛兵六名及本地長防勇四十名合鎮地面遼濶區區勇丁百餘名巡防殊難周到本擬稟請添撥營伍而聞湖防陸軍現方有抽調之令其勢斷難兼顧欲濟目前之急不得不自籌保衛之方惟勇丁一名所費不貲籌款旣難招募非易職等現在就地籌捐趕備飛划八號募練水勇四十名藉資巡緝第新集之勇非得諳悉營務之員不足以資訓練茲查有候補府經歷夏經歷尙忠勤慎樸實久歷戎行而於潯鎮地方亦復情形熟悉擬請飭委管帶以專責成至洋鎗藥彈尤爲巡防緊要之具先行開單呈電籲懇給文具領繳價爲此將籌備飛划緣由並擬具章程十條呈乞大公祖大人俯賜察核詳委

夏經歷尙忠管帶潯鎮飛划會同在鎮水陸營汛協力巡防以資保衛實爲德便

湖州知府志批北省拳匪肇衅以來內地土匪私梟難保不蠢然思逞本府正以潯鎮近接太湖地方緊要時時爲念茲得該紳等就地籌捐添設飛划八號募練水勇四十名以資巡緝具見誼切桑梓洵堪嘉尙所議章程亦甚妥洽候卽札委夏經歷尙忠作爲管帶會同水陸營汛認真防護粘單附

湖州知府志照會爲照會事本年六月初七日奉臬憲榮排單札開照得浙省幅員遼濶匪盜夙多迭奉諭旨飭辦團練保甲藉資捍衛乃閱各屬稟報率多空言塞責求其

辦有實效者殊屬罕觀今者北省拳匪因與洋人爲難中外致開衅端從此兵連禍結正不知如何收拾本省禦侮事宜固當速爲佈置惟外匪內奸難保不乘隙而起爲吾民籌急救之策舍辦團練保甲而外別無良法查温台各屬民風素強此外如甯屬之奉象鎮紹屬之諸新嵗金屬之義烏東陽衢屬之江常開嚴屬之淳遂處屬之青田縉雲等縣均不乏勇敢之士果能激以忠義練習成團大可補官軍之不足應責成各該府作速督飭各縣會商紳董效古人毀家紓難之義由各殷富量力捐資各就城廂村鎮購置器械團集年少壯丁習練技藝無事則各安耕鑿有事則合力禦匪仍須慎選團總嚴爲約束毋任結眾滋

事其沿海團丁及各漁戶有能協助官軍奮勇禦敵者定當會詳撫憲奏請破格優獎以示鼓勵當此外侮內憂交偪而來正官民卧薪嘗膽之日且本省財力有限未能處處設防如能上下一心使人人以身家爲重力圖自保則眾志可以成城何患不固若金湯是在各守令善爲董率而鼓舞之耳合亟排遞札飭札府立即督飭所屬遵照刻日會董將團練事宜妥速舉辦限半月內辦竣稟復由各該府親臨點驗以團練之是否認真定各牧令之優劣據實開摺稟候核辦時事迫切各牧令如再仍前因循定行詳請撤參該府有督率之責亦當實力從事毋稍違延同干未便其保甲事宜亦飭認真抽查勿任匪類匿跡是爲

至要切切等因奉此查該鎮瀕臨太湖地方緊要前據稟稱就地籌備飛划八號添募水勇四十名以資巡緝等情前來卽經批示在案茲奉前因除通飭各縣遵照外擬合備文照會爲此照會貴紳等請煩查照憲檄事理將團練保甲事宜會同印委各員認真舉辦一面仍將飛划巡緝各事妥爲經理隨時報查幸勿有稽是爲至要須至照會者

團防局章程 一添設水巡飛划八條每船一艙長三勇共三十二名另護局勇八名合計四十人 一聯絡陸巡潯鎮駐防楚軍新左營抽調四十名會同水巡分查四柵每柵二十人以專責成遇有搶劫之案 鑼爲號迅速馳

援遲延者重懲 一輪流督更仿唐公桂圃十家牌辦法
每十家立一牌輪流值夜輪值之家門外須掛一燈遇有
警報鳴鑼爲號沿途接應 一驅逐游民潯鎮匪類繁多
凡遇江湖賣藝以及流落鑣客人等一概不准停留 一
清查窩頓匪類入境必以煙館飯店客廡爲寄頓之所現
擬先行編查煙館門牌註明人口以便稽核自六月初十
日起煙館一律十句鐘息燈按段嚴查違者封閉 一稽
察客船光蛋遊匪以船爲家聚散無常飛划往來梭巡如
遇客船情跡可疑者勒令出境或夜深不願出境者必得
搜查有無禁器以免匪類混跡 一修理柵門潯鎮所有
柵門年久失修甚有廢棄者現定擇要修理舊者新之廢

者興之水柵亦一律修整 一開除局用飛划統帶每月
薪水洋銀二十元司事二人每月薪水洋銀十四元工人
兩名每月洋銀五元火食雜用每月洋銀六十元艙長工
食每月洋銀六元水勇工食每月洋銀五元 一籌備經
費以上所費作爲一百股已經紳商認定現在每股先收
四千文公議不敷按股勻攤不得推委 一預定賞格重
賞之下必有勇夫凡遇搶劫之案奮勇兜拿當場擒獲者
以及事後通風人贓並獲者酌量案情大小以定獎
輕或不幸有受傷之人酌給醫費拒捕身亡者從豐棺殮

撫卹其家

民團公所 宣統三年里人龐元濟等籌捐招募民團裁團防

局而歸併之設額三百六十名以前湖防統領費金組爲團長賃民房設局并分駐四柵以資巡緝九月十八日成立清鄉局 光緒季年梟匪猖獗江蘇藩司瑞澂爲督辦江浙清鄉事宜因設局於潯賃居民房爲辦公之所戶口查訖局卽裁撤

洗心遷善局 在東柵懼字一圩晏公廟西地爲張星齋所助計二畝一釐光緒十二年陸墉等稟請仿照郡城章程建造向南平屋五間三進費二千餘緡府委佐雜一員駐局管理曰洗心以治世家不肖子弟曰遷善則地方痞棍責治拘押其經費由富商捐助並於絲包撥捐一角各業又有永愿常捐

蔣錫紳洗心遷善局碑記烏程縣治之東轄巨鎮以十數最所稱南潯鎮有聲南潯距縣治七十里而近市廛櫛比烟火萬家又境隣江蘇宵小易匿迹鎮之羣不逞者與連輒橫行市中有睚眦怨必報復里有婚喪事恒相率造其門索不遂則同聲詬詈之必饜其欲而後去或鳴于官捕治之逾時復出橫如故鄉人皆患之謀所以處之之道僉曰惟郡中洗心遷善局之法爲最良洗心遷善局者前太守鄒惠清觀察所設也曰洗心則故家之不類者居之曰遷善則市井無賴居之禁錮一室朝夕邏守之局之司事者曰與之講說善事有不率者則有司董之錮旣久悔心慚萌或親族來保則釋之許其自新往往爲良民以去鎮

之人議既成乃上其事於郡縣及憲司皆報可於是清河張氏首捐地一區其餘斥貲以助興建者踵相接五月而工竣落成之日捕其尤者禁錮之羣小皆斂迹或竄避他方不復至閭里爲之一清焉明年春錫紳歸自海門羣使爲之記不獲辭乃著其緣起而識于後曰天賦人以至善之性而又有賢父師督責教誨之自少至壯若川之有防兢兢焉懼其或潰也及夫組織仁義琢磨道德其上者爲名公魁儒下亦狷介自守型於一鄉匪僻之途不必禁而自絕也方嘉慶道光間南潯講學之盛甲于他處錫紳生晚不獲隨諸老師宿儒後奉手受教而過庭之時習聞緒論孜孜以窮經敦行爲務迄今遠或百年近且數十年而

流風遺韻蕩然無存者何耶科舉之學溺人既深而耆宿淪謝復無人焉爲之提倡于其間使之窮經而敦行輕儇之習遂成風俗可不懼哉昔漳浦蔡文勤公既沒之後其鄉人不敢賭博者猶三十年遺風所被興起若此况身爲化導者乎余既憫夫斯人之不幸而自蹈于禁錮而尤願吾鄉人士力敦古誼以復諸老輩之盛善氣薰蒸咸遵軌轍則斯局之設特一時權宜計耳局經起於光緒十三年正月至六月而告成時官斯土者知府漢軍丁鶴年同知上海瞿永嘉通判甘泉劉克成知縣延津徐振翰南潯司巡檢嘉應張麟石總局事者候補巡檢歙方洪亮也例得備書光緒十四年二月里人蔣錫紳撰

按記未曾勒石故不入碑刻

設立洗心局公呈

節錄

具稟前福建漳浦縣知縣陸墉職員

談熊江舉人蔣錫紳周慶賢廩生張爾欽陸熊祥增生唐宗堯監生徐星年附生梅福墉張爲弼張爲第蔣選錢爲籌設公所化莠安良叩請批飭遵辦事竊南潯一鎮人煙稠密良莠不齊良家子弟被人誘惑洋烟賭博無所不至其父兄約束則不從欲送官懲治有碍顏面遷延日久流爲匪類伏念前府憲鄒于郡城創設遷善洗心局所有不肖子弟及流爲無賴者准由該管父兄送所羈管使之自新裨益匪淺惟郡城所設公局屋宇無多若潯鎮亦按名并送勢難容棲職等公同商議擬請在於潯鎮就近地方仿照郡城遷善洗心章程設立遷善洗心局遇有不肖子

南潯志

卷二 公署

十

弟以及棍徒卽送公所羈管以冀悔悟自新並請遴派委員督同經理所有建造公所督同工匠估計需錢二千串左右已由闔鎮店舖情願捐集至每年應需經費又經紳富劉鏞龐雲鏜張鴻順張成績邱其樑金桐邢基等按年共捐錢五百捌拾千文絲業周申昌梅恒裕沈天長等允議售絲一包捐洋壹角統計每歲所入足資敷用無慮匱乏惟公所基地係監生張星齋等愿將祖遺公產坐落潯東一百七十一莊懼字一圩計地二畝一釐合族出立助契捐入公所業經稟請邑尊飭承過戶並由職等擇吉建造爲此酌議章程繕摺呈核至於用過經費年終刊刻徵信錄分呈府縣報銷以昭覈實祈核詳立案

湖州府知府丁鶴年通稟

節錄

據南潯釐局委員劉令申據

該鎮紳士陸墉等稟稱現於潯鎮創設遷善洗心公局應需經費除已捐集外尙恐不敷茲據絲商允捐售絲一包助洋一角自光緒十三年正月初一日爲始按期隨同正捐彙交絲業公所俟職等隨時領取等情到局覆查是項經費係屬各絲商願助既無關於正捐亦非出自鄉民並無窒礙事尙可行申祈轉移立案等由過府准此卑府查南潯鎮爲烏程屬一大市居民櫛比鱗次良者固多莠亦不少自蒞任以後每督飭縣紳宣講鄉約循循勸誘以期默化潛移無如近效難收莠者不能卽時爲善誠如該職陸墉等所稟一經被誘子弟昏迷不覺父兄管教不易難

免匪類爲伍若一概繩以官法又似不教而誅欲期化莠爲良莫若送入洗心遷善公所錮其身足使桀驁之氣不得不消發其天良使愧悔之萌不得不力誠爲地方變惡爲善之良法且卑前府鄒守在郡城設所以來頗著成效所患者屋宇無多經費有限勢難各鎮兼收現據該職等請於潯鎮地方仿照郡城章程創建洗心遷善公局所需經費業已捐有成數而所籌絲捐又係出諸絲商樂輸既經釐局查明於正捐鄉民兩無窒礙所擬章程亦尙妥洽應准照行除批飭該職等實心任事一俟建造工竣卽行照章稟候委員督同辦理並札飭烏程縣隨時稽察期收實效外理合據情轉詳仰祈憲臺察核俯賜批示立案光

緒十三年二月二十八日奉撫憲衛批如詳立案仰卽董飭縣董隨時認真稽查悉心經理爲要並報明臬司查照仍候督部堂批示繳

洗心遷善公所章程

一洗心所專收士商家子弟不遵父兄教訓喫煙賭博游蕩之人禁錮期年察有悔悟之機由本人父兄親族保釋 一遷善所原爲賭博小竊以及好勇鬪很動輒滋事未便繩以官法卽由公所羈管若係捐販盜竊行凶之人罪在徒流以上者應聽地方官懲辦不得拘入公所以昭慎重 一凡入洗心所之人其能識字者督令熟讀善書以資覺悟定以功課倘有不能完功者隨時戒飭其有舊習手藝者亦令隨時工作以振其

志氣 一凡入遷善所之人稍能識字者亦令熟讀善書並隨其力之所近課以工藝 一公所經費有限凡入洗心所者原係體面人家子弟每年津貼飯資錢三十千文 一洗心所所收管之人遇有疾病延醫調治如患危急之症卽令其父兄親族領回醫治 一遷善所所收管之人疾病一體延醫調治遇有疾不可爲至於不測卽令其父兄親族買材收殮如無父兄親族之人由師善堂殮埋隨時稟報查考 一除委員薪水飯食悉照郡章外議設司事一人看役兩名把門聽差各一名水火夫兩名每月各項薪水工食由司事按月分別給發不准預支 一公所之設本係地方善舉董事諸人不得開支薪水公所事

宜每月董事二人督同經理十二人按月輪流不得推諉
一公所用欸每月由司事謄寫月總一本交司董查核
年終彙入徵信錄 一公所每年經費由紳富捐助永愿
並由各絲商按包捐助如有餘盈年終交典生息並將
存典錢洋數目刻入徵信錄各董事不得私自存放致滋
流弊 一公所支收錢洋總數每年刷印徵信錄分別送
呈府縣衙門並紳富士商以備存查而昭核實

光緒三十三年續增章程 一委員薪資務須減給以消
分湖各委餽差之藁如果兼管則保甲之俸決刪無疑護
勇舊設四名應減二名看役時有多少仍不得聽衙役混
充如有添減須由董事承認以杜流弊 一該所如有違

章暫寄代押等情司月董事仍有特別舉發單銜稟訐之
權扶徇同科 一遷善浮額剋日實行開釋以達善後改
良之目的此後遷善收管事由除立表宣佈外一面知照
董事以資稽核 一司賬照章一人主持外司事幫賬名
目毋容增列以符現章司年司月之宗旨 一司年定六
家司季董事定八人 一本局護勇現在暫定二名看役
三名水火夫二名更夫一名管門一名 一洗心飯資應
卽追討自繳齊後照章預收三個月以後如欠至一月以
上者送還原保自行管束 一遷善原額十名現加二名
額滿後倘有送進局中開明案由暫押三天隨請月董決
議如應拘押於原額中擇輕者開釋以補其額至詞訟案

犯不得擅收

自治局 宣統元年省城設自治籌辦處鎮鄉限三年一體成立鎮紳有預備自治會之設二年八月間從事調查三年正月正式選舉四月推舉會長而議事會成立五月選舉正董副董及名譽董事而董事會成立局所暫借義倉

禁煙局 禁煙之議創於光緒三十二年八月假鳳梧堂為局所局長局副以官紳分任之有調查員二十人以停閉煙館調查私吸為主並發戒煙丸設戒煙局延醫診治調查煙戶發給煙照之事皆屬焉

稅務 烏青志云宋時稅務在眾安橋北鎮官兼領收租德祐丙子後移安利橋南為酒醋稅務兼收兩鎮稅課大德年間

南潯志

卷二 公署

十四

各歸所屬烏鎮屬湖州移在南潯青鎮屬嘉興移在石門止管稅課酒課按今清風橋之西猶有務前之稱而遺址湮沒潯溪坊 宋時烏鎮稅務分設酒醋坊凡十六所一在潯溪今

南柵有醋坊橋北柵有酒坊橋蓋其遺址

汪志按談鑰吳興志云監烏青墩鎮

稅務兼煙火公事一員多差文臣京官又云烏墩鎮稅務在本鎮每半月合發一千七百七貫文經係本鎮團綱起發赴州庫潯溪坊係民戶買撲每半月納坊名課錢

稅課局 湖錄元官澤稅務在縣東七十二里明官澤稅課局勞志云即元官澤稅務洪武二年改為南潯館驛十年革十八年置為稅課局明會典云嘉靖四十五年革按是年巡按御史龐題革其衙門員役工食俱入條鞭徵解

汪志按舊志並云洪武十

八年置二十年革正統十二年重置嘉靖十年革與湖錄異又按官澤在縣南七十里地屬一都稅務有官澤之名意初

設在官澤後
移南潯歟

南潯館驛 明洪武二年置十年革

范 范鐸潯溪紀事詩稅務廳前草色青太湖館外水盈汀數

殘津堠東西路不見春風古驛亭 東遷館在縣東四里本名太湖館

釐捐局 同治初創抽釐助餉之策南潯以絲捐為大宗四年

設局於鎮設卡於各柵口出入貨項照則抽收惟絲經正捐

由絲商設立絲捐公所經收捐欸填給聯票然後赴局投換

護照按月照解不同各捐之徑由該局主政也局所在南柵

蔣家橋南賃居民房

洋藥局 光緒十年由滬關派委員一人駐鎮查驗洋土印花

賃東柵民房為局所

南潯志

卷二 公署

十五

潯溪鋪 宋時東門塘路郵遞四鋪一在潯溪今無攷

三里鋪 在鎮西三里橋今廢 汪志按劉沂春崇禎烏程縣志云三里鋪縣東四十二都鋪兵

三名高必騰康熙烏程縣志同此後府縣志並不復載蓋苕溪驛既裁故遞鋪亦廢

郵政局 在北柵中市賃居民房光緒季年設置今為二等郵

局設局長一員郵差若干名

電報局 光緒九年始設電綫自上海至潯鎮由潯達蘇州歷

嘉興府通杭州委員一人電生四五人二十年電桿通至湖

郡局遷城內潯鎮改設分局賃居北柵民房無常處今為二

等電局設局長一員電生若干名

甯紹會館 在北柵外下壩嘉慶中建咸豐時燬同治五年重

建光緒十六年復建

新安會館 在南柵寓園旁其廳事曰遵義堂後供朱文公神位道光十一年建咸豐時燬同治四年重建又別置公所于醋坊橋東竹園頭道光十六年建咸豐時未被燬

金陵會館 在南柵廣勝橋東北光緒十一年建嗣又別置厝所於對岸箋一圩

閩公所 卽福建會館在南柵陳家墩其廳事曰正中居久圯絲業公所 同治四年春絲商莊祖綬李桂馨吳鐵江華銘軒等稟請藩司蔣批准設立以收解捐稅維護絲商爲職志假南柵廣惠宮隙地建屋三楹爲辦公之所公舉董事聘用司事經理其事其經費由絲商按出洋絲包酌提若干應用其時龐公照邵棠等籌辦地方善後其始募之殷戶後因本鎮

殷富業絲者居多數乃於絲包出洋每包輸捐洋兩元作爲籌辦義舉之用稟請湖州府楊批准立案嗣改絲每包輸捐洋一元經則半元至十二年又減半十三年停止共輸洋八萬餘元其欸均由公所職員經收轉解備書於此